

## LIAUSUM PIAKKUL!

Mt 5:25-26

*Lampi ah napai laitakin, nagalpa tawh kilemna dingin hanciam in. Tua hi kei leh thukhenpa khut sung natung dinga, thukhenpa in palikte khutsung ah hong apin, palikte in thong sungah hongkhum ding hi. A mantakin kong genin-ah: Na liausum napiak khit matengin thongsung panin nasuakta ngeikei dinghi* (Greek version pan).

Hih Laisiangtho sung i etciangin, Topa'zat kammal pawlkhat te in eite athupi mahmah thu pawlkhat hongphawksak hi. Tua kammal te khatkhithkhat i ensuk dinghi.

### i) *Lampi ah napai laitak in*

Amasa pen in '*Lampi ah napai laitak in*,' cih kammal ahihi. St Cyprian, St Ambrose, St Jerome leh St Augustine te in hih Topa kammal tawh kisai in hici bangin honghilh uhhi: Topa in, '*lampi ah napai laitak in*' (*on the way*) acih ciangin hih leitung nuntak hun agen ahihi. Hi leitungah mihinga i pianna in, leitung ah khualzin mite i hi a, Pa' inn ahi vangam zuan in apai te i hihi, ci uhhi. Eite in zong, leitung kakhualzin nagam aw, simlei luahdng omlo cih bangin thu i gena, la i sa hi. Tua ahih manin, leitungah i nuntak laitengin kilemnang i hanciam dinghi. Banghanghiam cih leh Christu Topa in Van le Lei hong kilem sakkik Topa hi-in, amah a um khempeuh zong kilemna sungah anuntading in hongdeih ahihi.

ii) **Thukhenpa**<sup>7</sup>

Kilemna omlo in, kigalneihna, kimuhdahna te tawh nuntakna in ama sisan bua in sihna hongthuakna tawh kilemna hongpia pa ahi Topa' deih nuntakna tawh kilangngat tawntung hi. Kilemna i cih in Pasian tawh kilemna leh mite tawh kilemna ahihi. Mite tawh kilemna in Pasiantawh kilemna piangsak a, Pasian tawh akilem mite in mite tawhzong kilem loh apha mawh ahihi. Hihthu hangin, Pasian tawh kilemna neilo in khualzinna leitunghun beithe i cihthu hong phawksak hi. Tua bangin, simlei khualzinna hongbei takciangin, thukhenpa ahi Christu Topa tawh i kimu dinghi. Hih thuhangin, Topa honggen *thukhenpa* in amahmah ahihi. Banghanghiam cih leh Topa in si le hing te thu hongkhen ding thukhenpa ahihi.

Sawltak 10:42 na sungah:

Kote in mite kiangah thu kahilhna dinguh leh mihing leh misite tungah thu akhen dingin Pasian in amah a sehna thu teci apang dingin ahongsawl hi.

Timothy Nihna 4:1 na ah zong Paul in hih ci bangin na gen hi:

Pasian' mai leh mi khempeuh' thu akhending Christ Jesuh' mai-ah nakpi takin kahong hanthawn hi.

iii) **Palikte**

Topa in thukhenna athuak mite pen Palikte khutsungah ki-ap dinghi ci-in, honghilh hi. Thukhenpa in Topa hi leh, Palikte acih in kuate hidinghiam? Leitung palikte agen ahihloh nathu i thei hi. Tua hi leh kua te hidinghiam i cih ciangin, vantung mite (*angels*) te cihna ahihlan i theithe i hi (cf. Piancil 3:24).

iv) **Thong**

---

<sup>7</sup> Zo Laisiangtho pawlkhat te ah, *thukhente* ci in kigelh hi. Mikaanglai in *the judge* ci in singular tawh nakigelh in, kawllai in **w&m;olMuD**; ci in naki gelh hi. Tua ahih manin, *thukhente* sangin, *thukhenpa* ci leng manzaw dinghi.

Topa hong genna ah, tua thukhenna athuakte pen Palikte in thongsungah khumdinghi ci hi. Thukhenpa in Topa hi-in, palikte in vanmi te ahih leh, Topa honggen "thong" in leitung thonginn agen ahihloh nathu hongtheisak hi. Tua hi leh, bang *thong* agen hiding hiam? Leitung khualzinna abei ciangin, thukhenpa Topa tawh kimu in, thukhenna athuakding te i hihi. Pasion tawh kilemtak a anungtalo mite in vanmite khutsungah ki-ap in vanmite in thong sungah hongkhum dinghi ci hi. Tua hi leh, leitungnunna abeikhit, thukhenpa Topa sawlna bangin, vantungmite in thongkongcing ding ahih manin, tua in, leitungnuntakna leitungpumpi thuakna thonginn hi ci-in i genthei ngeikei dinghi. Tua thu hangin ***kha thongkiatna thonginn*** omhi cihpen teltak in kimu thei hi. Tua kha kikhum na thonginn pen eite in Gimna neu ci-in, min i vawh hi.

Gimna neu i cih ciangin, athuak gimna te bangzahdongin thuakhak a, bangzah ciangin thuaknuam hiam cih genna ahi kei hi. Gimna neu cihna in, tawntung gimna meikuangpi sung ah omlo hi cihna bek ahihi. Lamkhatpan in genleng, Gimna neu cih akhiatna in, nikhatni ciangin tua gimna pan suakta dingcih lametna anei lai kha te athuak uh gimna cihnopna ahihi.

#### v) **Liausum piakkhith keileh suakta loding**

"Liausum napiakkhith matengin tua thongsungpan in nasuakta ngeikei dinghi," ci-in, Topa in hong hilh hi. Topa gen thonginn in leitung thonginn hilo ahih leh, liausum cih kammal in bangkhiatna nei ding hiam? Thongkia mite adingin liausum cih kammal in bangkhiatna neihiam? Liausum cih in mawhna thaman hanga i thuakding gimna dan pan kitatna sum ahihi. Tua hi leh Topa honggen liausum in mawhna hanga gimna athuak mite in amawhna dan uhan asiantho theihngan in, mawhna danlohna a apiak uh sum ahih kul hi. Tua liausum in mawhna thaman dan thuakna ahihi. Tua ahih manin, leitung nuntakna nusia in, thukhenmang ahi Topa tawh kimuh takciangin, Pasion leh mite tawh kilemtak a i nuntak lahna te,

Pasian deihna banga i nuntak zawhlohna te hangin, i kha in thongkhumna thuakin, amawhna thaman lohloh dinga, ahi zong in alohsiang khitciangin, tua thonginn panin suakta ding hi cihna ahihi.

Leitungnunna abeikhitciangin, tawntung gimna meikuang pi sung tunglo in, asuakta theilai kha pawlkhat in amawhna thaman dan thuakin thongkhumna thuak hi cihthu i thei hi. Tua thonginn sungpan in amawhna dan te uh alohkhith uhtak ciangin, amaute suakta in Pasian gamzuan dinghi cihthu Topa Jesu in eite honghilh hi. Hihthu hangin Christian te in kha thongkiatna munpen *purgatory* Gimna neu ci-in min akivawh ahihi. Lamkhatpan in genkikleng, tua kha thongkiatna mun ahi gimna neu in, kha te kisanthosak namun ahihi. Hih thu hang in, Catholic Christian te in Gimna neu omhi ci-in i thei hi.